

ՍՏԱՍԲՈՒԼԻ ՀԱՅԿԱԿԱՆ
ԿԵՆՏՐՈՆԱԿԱՆ
ՎԱՐԺԱՐԱՆ

Բարձրագույն կրթական այս հաստատությունը հիմնվել է 1886-ին Կոստանդնուպոլսի Ղալաթիո թաղամասում՝ պատրիարք Ն. Վարժապետյանի և հայ մտավորականության առաջավոր ներկայացուցիչների ջանքերով: Նպատակն էր սաներին տալ հայեցի կրթություն, Պոլսի և գավառների հայկական դպրոցների համար ուսուցիչներ պատրաստել:





Այստեղ դասավանդել են այնպիսի հեղինակավոր անձինք, ինչպիսիք են Հովսեփ Շիշմանյանը /Ծերենց/, Թ. Կյուլեսերյանը, Պերպերյանը, Եղիշե Տեմիրճիպաշյանը, Հակոբ Պարոնյանը, Հակոբ Ասատուրը, Հակոբ Օշականը, Լևոն Շանթը, Վահան Թեքեյանը, Գարեգին Սրվանձտյանը և այլք: Դասավանդել է նաև Կոմիտասը:

Պոլսահայերը, մասնավորապես Կեդրոնականի ուսուցիչները, աշակերտները կարողանում են պահել, պահպանել մեր հոգևոր արժեքները և վարժարանն ավարտելուց հետո հեռանում՝ զինված բարձր գիտելիքներով, ինչպես խոստովանում է Դարա Խաչիկօղլուն. «Հիմա ավելի հետաքրքիր եմ կյանքի օրվա դեպքերու հանդեպ: Կեդրոնական հաճախելով՝ թե՛ համայնքեն չհեռացա, թե՛ մեր մշակույթի և պատմության մասին ավելի ընդարձակ տեղեկություն ունեցա»:

Տարեցտարի Ստամբուլում կրճատվում են հայկական դպրոցները:
Ազգային Կեդրոնական վարժարանն իր վաղեմի և այժմյան
համբավով մնում է դեռևս կայուն և նախընտրելի:
«Ստամբուլում գործող հայկական 16 կրթօջախների ճակատագիրը
անկանխատեսելի է. պոլսահայերից շատերը արտագաղթում են,
մի մասը նախընտրում է իրենց երեխաներին տալ թուրքական,
անգլիական, գերմանական դպրոցներ, որտեղ կրթական որակն
ավելի բարձր է և զգալիորեն հեշտացնում է հետագայում
համալսարաններ ընդունվելու հարցը»,- գրում է Ռուբեն Մելիքյանը:

Այս պարագայում Ազգային Կեդրոնական վարժարանը ազգահավաք, լեզվապահպան մեծ դեր է կատարում. աշակերտների առավելագույն շարժ կա դեպի Կեդրոնական: Բարձր է ուսման մակարդակը, որի շնորհիվ աշակերտների 95%-ը ընդունվում է իր ընտրած համալսարանը: Կեդրոնականը ժամանակի հոլովույթում պահել ու պահպանել է իր ուրույն դիմագիծը այնպես, ինչպես Թուրքիայի տարածքում գտնվող սակավաթիվ եկեղեցիները, որոնք չեն ավերվել, չեն զրկվել խաչից ու պատարագից:



Հայկական կրթօջախները աշխարհի
բոլոր ծայրերում օազիսներ են,
փրկության հանգրվաններ, որոնց
շնորհիվ հայորդիների շուրթերից չեն
կորչում մեր այբն ու բենը, չեն
մոռացվում նարեկացին ու
Կոմիտասը, չի փոշիանում մեր
ազգային ինքնությունը: